

STATÜTS

Societed da chatscheders Droslöng

1. Nom e sez

Suot il nom "Societed da Chatscheders DrosLöng" (numno seguaint societed) exista üna societed i'l sen da l'artichel 60 ff dal Cudesch civil svizzer cun sez al lö da domicil dal president.

2. Mira

La societed ho in mira da promouwer ils interess da la chatscha da patenta grischuna, da mantegner e cultiver la sulvaschina e da s'ingascher per l'execuziun d'üna buna chatscha sün territori da la regiun Suot Funtauna Merla (La Punt Chamues-ch, Madulain, Zuoz, S-chanf, Cinuos-chel e Brail). Impü dess gnir cultiveda l'amicizcha traunter ils commembers.

3. Commembranza ill'Associaziun da Chatscheders da Patenta Grischuna (BKPJV)

La societed es commembra da l'Associaziun da Chatscheders da Patenta Grischuna (numno seguaint Associaziun) e dal district Engiadin'Ota da l'Associaziun da Chatscheders da Patenta Grischuna.

4. Mezs

La societed dispuona da seguaintas entredgias:

- Contribuziuns annuelas dals commembers
- Contribuziuns chantunelas per la chüra
- Imprevis

La contribuziun annuela vegn fixeda minch'an a la radunanza generela. Cun la contribuziun annuela da la societed inchascha la suprastanza tals commembers A la contribuziun da l'Associaziun, la quela vain pajeda a l'Associaziun.

Impü inchascha la suprastanza la contribuziun per la giazetta Chatscheder Grischun (Bündner Jäger) tar tuot ils commembers chi haun abuno tela sur la societed. Quista contribuziun stu eir gnir pajeda a l'Associaziun.

5. Commembranza

Commembers activs (commembers A, B, d'onur, libers, veterans e candidats) da la societed sun personas natürelas. Commembers passivs u fautors da la societed paun esser personas natürelas u giuridicas. La societed disferenzchescha seguaintas commembranzas:

Commember A

Commembers A haun dret da vuscher e da tscherner in tuot las fatschendas e sun oblios da pajer las contribuziuns da la secziun e da l'Associaziun. Commember A po dvanter, chi chi ho il dret dad ir a chatscha i'l chantun Grischun.

Commember B

Commembers B sun commembers A in ün'otra secziun da chatscheders da l'Associaziun. Els haun dret da vuscher e da tscherner be in fatschendas da la societed - na da l'Associaziun. Els sun oblios da pajer la contribuziun da la secziun.

Commember d'onur

Commembers d'onur paun gnir numnos tres la radunanza generela sün proposta da la suprastanza. Els s'haun acquisto quist merit tres prestaziuns straordinarias per la societed. Commembers d'onur sun deliberos da tuot las contribuziuns.

Commember liber

Commembers chi accumpleschan i'l an curraint il 75^{avel} anniversari e sun daspö 25 ans sainza interrupziun commembers ill'Associaziun dvaintan commembers libers. La societed nun es pü oblieda da pajer la contribuziun a l'Associaziun. Percunter nu sun commembers libers deliberos da la contribuziun da la societed.

Veteran (contribuziuns vair commember A)

Commembers chi accumpleschan i'l an curraint il 60^{evel} anniversari e sun daspö 25 ans sainza interrupziun commembers ill'Associazion dvaintan veterans e survegnan la distincziun da veteran da l'Associazion.

Candidats

Persunas, chi s'haun annunzchedas per l'examen da chatscha dal chantun Grischun, paun gnir pigliedas sü illa societad. Ellas nun haun dret da vuscher e da tscherner in üngünas fatschendas e nu pejan üngüna contribuziun a la societad ed a l'Associazion. Tar reuschida da l'examen dvaintan ellas commember A.

Commember C (passivs) u fautuors

Persunas, chi nun haun il dret dad ir a chatscha i'l chantun Grischun, paun gnir pigliedas sü illa societad scu commember C u fautor. Ellas haun dret da vuscher e da tscherner be in fatschendas da la societad - na da l'Associazion. Ellas paun abuner la giazetta Chatscheder Grischun (Bündner Jäger) sur la societad.

Commembers chi nun accumpleschan lur dovairs statutarics adonta admuniziun in scrit, paun gnir exclus tres la suprastanza da la societad.

6. Accoglientscha

Dumandas d'accoglientscha stögljan gnir drizzedas al president da la societad; sur l'accoglientscha decida la radunanza generela. Cunter üna dumanda refüsedada scu commember A po gnir fat plaunt in scrit infra 30 dis daspö cugnuschentscha da la decisiun tar la suprastanza centrela da l'Associazion. La suprastanza centrela decida definitivmaing.

7. Finischun ed exclusiun da la commemoranza

La commemoranza glivra cun sortida, exclusiun tres la radunanza generela, la suprastanza centrela da l'Associazion u la mort. Cunter l'exclusiun tres la radunanza generela po gnir fat plaunt in scrit infra 30 dis daspö cugnuschentscha da la decisiun tar la suprastanza centrela da l'Associazion. La suprastanza centrela decida definitivmaing.

8. Organisaziun

Ils organs da la societad sun:

- a) La radunanza generela e la radunanza da prümavaira
- b) La suprastanza
- c) Ils revisuors da quint
- d) La cumischiun da trofeas

- a) La radunanza generela e la radunanza da prümavaira

La radunanza generela es l'organ suprem in tuot ils affers da la societad. Ella vain convocheda, suot indicaziun da las tractandas, almain 10 dis ouravaunt e per regla i'l prüm quartal da l'an.

La radunanza generela convocheda es cumpetenta da decider sainza resguard sü'l numer dals partecipants. Ella decida cun simpla magiurited da las vuschs.

La radunanza generela ordinaria tratta ils seguaints affers:

- Approvaziun dal protocol e dal rapport annuel dal president
- Approvaziun dal quint annuel cun rapport dals revisuors da quint e dis-charg da la suprastanza
- Fixaziun da las contribuziuns annuelas
- Tschernas (mincha duos ans)
- Tschernas da delegios
- Propostas da commembers A a maun da la radunanza da delegios da l'Associazion e/u a la cumischiun da chatscha da l'Associazion.
- Accoglientschas ed exclusiuns da commembers

- Undrentschas (nominaziuns da commembers d'onur, commembers libers e veterans)
- Appruvaziun dal program d'activitads
- Müdamaints da statüts
- Schoglimaint da la societad

La radunanza da prümavaira e/u radunanzas extraordinarias vegnan convochedas da la suprastanza seguond bsögn u sün pretaisa in scrit, suot indicaziun precisa da las tractandas, dad almain ün tschinchevel da tuot ils commembers.

La radunanza da prümavaira po tratter ils seguaints affers:

- Propostas publichedas illa giazetta Chatscheder Grischn (Bündner Jäger) a maun da la radunanza da delegios da l'Associaziun
- Tschernas da delegios
- Müdamaints da statüts
- Imprevis, suot indicaziun precisa da las tractandas

b) La suprastanza

La suprastanza as cumpuona dals seguaints tschinch commembers tschernieus da la radunanza generela:

- Il president
- Il vicepresidente / actuar
- Il chaschier
- Il schef da chüra
- L'assessur

La suprastanza rapreschainta la societad vers inour. Ella es responsabla per l'execuziun da las decisziuns. Il president ed il schef da chüra rapreschaintan uffizielmaing la societad a la radunanza dal district Engiadin'Ota. La suprastanza dispuona d'üna summa annuela da frs. 1'500.00.

c) Ils revisuors da quint

Els examineschan il quint annuel e daun giò ün rapport in scrit a maun da la radunanza generela ordinaria.

d) La cumischiun da trofeas

La cumischiun da trofeas as cumpuona da nouv fin ündesch commembers. Ella es responsabla per üna stima correcta da las trofeas.

9. Müdamaints da statüts

Ils statüts da la societad paun gnir müdos, scha duos terz dals commembers preschaints a la radunanza correspondent a la societad approuvan ils müdamaints tractandos. In cas da differenzas da text velan ils statüts scrits in rumauntsch.

10. Schoglimaint da la societad

Il schoglimaint da la societad po gnir decis cun üna magiurited da duos terz vuschs, scha la magiurited da tuot ils commembers da la societad es preschainta. Scha la radunanza generela nun es cumpetenta da decider, schi po gnir convocheda infra ün mais üna seguonda radunanza, a la quèla decida üna magiurited dad almain trais quarts da las vuschs dals commembers preschaints.

11. Responsabilitad / Liquidaziun da la facultad

Per debits da la societad es responsabla be la facultad da la societad. Üna responsabilitad persunela da singuls commembers da la societad es esclusa.


Scha la societad vain scholta, stu tuot la facultad gnir depositada tar l'Associaziun da Chatscheders da Patenta Grischuna. Scha vain fundeda infra 10 ans üna nouva societad in nosa regiun, appartegna la chascha a tela, in cas cuntrari po l'Associaziun da Chatscheders da Patenta Grischuna dispuoner da la facultad.

12. Disposiziuns finelas

Quists statüts sun gnies acceptos ed approvos a la radunanza generela dals 6 favrer 2020.

Per la **Societad da Chatscheders DrosLöng**:

Il president:



.....
Gian Andri Godly

L'actuar:



.....
Marc Wolf

Per l'**Associaziun da Chatscheders da Patenta Grischuna (BKPJV)**:

Il president:


.....
Robert Brunold

Il vicepresidente:


.....
Tarzisius Caviezel